


四明叢書

張宗祥



錢忠介公集卷十七

契家後學全祖望編次

縣後學張壽鏞校補

南征集七

五言古

迎陽詠

并序

余泛海入閩適遇龔甫傾蓋交也亂孔亟余又將攜
妻子客海島公止余毋往中夜秉燭曳履叩余舍數
四唯恐余之去也夫人情誰不顧家余自欲海耳勿

聽公而去之卽湛妻淪子余自左計公勿爲薄然而公如此又其時公之家亦卒卒未有寧宇也棄勿顧而憇留余以爲累翼余險扶余顛寧余婦襁余子董余僕夫廬余廬室余室爲余謀者萬乃全焉嘆息之聲恆續也公古人哉余嘗讀杜子美詩云諸家憶所歷一飯跡便掃蘇公得數過歡喜每傾倒亂世人情千載如見夫以子美之才猶尙如此況余沈沈者哉然子美之遇蘇侯之德繇詩而傳不感不詩不詩不傳也余才謝曩賢不忍使公之德隱而不傳故於冬

至暇日爲作迎陽詠喻亂如陰亂世而迪吉人喻陰
盡而陽儷也余詩固不足傳要使後世知有羹甫者
鳳曆初窮紀麟書又泣時寒澌侵坤軸日車凌嶠夷蕪
城風沙削智井陰火噓積幽生夜氣貧鬼相給咎黃泉
種碩果拂鬱不得施如彼旅失次顛倒爲孤羈是日日
長至軒軒生羽儀漸達塊圯際霄旻蘆管吹始知天地
德不令衰者衰我生逢瘴怒載家孫海湄鯨鯢張翅舞
蛟龍挾舟馳皇天降割汝呼號若何其更逢綠林客獐
獐樹髮髭強者故囓啗弱者佯吁噫其語若飛屑嚙沓

不可知。胠篋細詞視清風。難贈持多謝。諸少年爲余解。
澠淄百死脫虎口。恐懼呼妻兒。顧瞻道路長。惻悵中心。
悲哀俗較衡。續慷慨施者。誰漂母不復作。王孫空自飢。
豈知仁者心。盎盎春露滋。百草腓道旁。斤斧之所遺。一
莖不被霜。玄雲滲漉之。渾忘神功大。翻謂覆載私。嗟余
遺世士。斷尾同雞犧。於公復何利。而乃軫念爲愧非。蓬
萊鶴白玉。紛葳蕤。又無子美賦文采。燦陸離。越鳥中夜
鳴。感彼仁者慈。羽音何足數。芳名千古垂。

題翁德五小像爲流觴曲水并序

凡小像之設皆所以寫情散意假景調身厥類匪一
故或搢笏垂紳雍容廟堂之上或鹿裘筇杖逍遙山
林之下二者靜飾不同然而山林尙矣良辰吉日嘯
侶命儔匪公匪侯我璞我寶花無情而嬌笑烏有韻
而笙歌尋芳選勝以山水爲鼎鐘坐褥憑茵以天地
爲帷帳清風發發不須錢買流水湯湯豈爲勢來斯
乃竹林所以稱賢蘭亭所以載蹟者也又況德五以
英妙之才具曠達之識者哉德五曰夫將自其異者
視之一我非我也將自其同者視之四我一我也適

已而已奚問幻哉余曰凡人有遐志廣度者皆古人
所託以寄其形容者也含情種智道集來今競秀追
歡風餘曩古借永和之故事修昔代之衣冠風流不
墜發曲水之英談陋摯生之僻說音響如新是曰逸
少重生可謂廣微復出傲淵明之舉杯抱獨笑太白
之對影成三一堂之上今今昔昔主主賓賓一我所
化豈有盡哉於是希聲復進曰是其中當有希聲在
吮毫濡墨佐之以詩

右軍不復作蘭亭暮春者蘭亭荒荒春曲水潺潺瀉土

女渺昔歡荆榛覆古瓦春爲蘭亭乎曰爲右軍也翁子
曠達士玉屑恆霏灑妙契蘭亭心豈必坐其下因作曲
水圖呼工爲我寫一身寄四座誰者辨真假但覺古人
手軒軒來相把林香釀百花流水浮三雅奉觴觴吉祥
歸來醉純嘏恨不呼希聲共結飛英社

贈萌蒞道人

東來有奇士肝腸白如雪遺我一端綺文采懸雙蜺中
有迴文詩千行萬行血飲酒不甚多酒酣歌一闋我聽
河上歌欲縮同心結蒼天生窮奇忠信遭抵批舉世無

宓妃爾焉所遺玦君言槩味甜謂有苦於槩有川廣廣
流有山矗矗列寒行則履冰暑行則觸熱惜哉曲躬難
豈謂地無穴

七夕擬古二首

上天本欲界牛女能無情不知始何歲亦復無終經秋
風稍稍起秋雲冉冉盈弦月澹澹發天河耿耿橫士女
乞巧思瓜果陳中庭彷彿本無覩意象參窈冥頓覺鵲
橋上飄飄雙桂旌繇其離恨各遂此幽歡并從來望夫
石能變貞女形亦有陽臺女雲雨感精靈宇宙甚寥廓

情想縱橫生況乃精氣結上天爲列星斯理不可說曠
然歸太清民今方喪亂田園不得耕高樓多怨婦丈夫
從軍行各有今夕意悲嘆何時平

中庭有桂樹曄曄飛華英條風初變煖秋氣遂凋榮傳
聞此月夕牛女相爲情天河不可渡靈鵲煩經營天河
淡欲沒蕭駕儼晨征明朝機杼上軋軋送怨聲姮娥老
璇室婺女儷天經二物咸在天何以酬孤貞

七言古

紀夢

并序

會夢五弟錫九宛然相對時久不見書以爲行矣不
數日而書到夢固有使之者哉

萬峯峯裏萬重雲煙霞溼處愁人立春風不解散離愁
雨聲無賴推窗入簷前靈鵲絕好音暝色堆來百愁集
雨聲愁聲渾織成織成愁字難收拾抱愁歸臥不成眠
棣花有路空堅澀昨宵夢汝來我前襖襟結束短衣褶
爲言歸去道路難一聲嘆息天地泣此嘆隔離千萬重
乘風直度通呼吸明朝星星見所夢書裏重封淚痕溼
開緘見爾憔悴容彷彿還與夢時同

四歌

悲士民將吏也長歌之言慘於痛哭矣

吁嗟爾民一何愚髡髮胡服滿交衢老者曰非不愛髮
不爾無以守田廬壯者曰非不愛髮不爾無以保妻孥
喑然一聲斂手立塊若腐肉委庖廚一旦禍發不自保
骨肉纍纍填焉烏問爾室家今在否問爾田園今有無
男兒寧當格鬪死人誰不死爾死徒地下若教逢故鬼
笑爾爾爾非吾吾弱子叫他父幼妻哭壯夫沙塵白日
鼠晝舞陰雨青燐鬼夜呼死者已矣復何說冤魂億萬

號天誅還有未死十萬戶漸次漁獵將安通譬如牛羊
齧草飲水在欄檻而曾不知豢汝飼汝之爲屠吁嗟爾
民一何愚

吁嗟爾士一何愚缺袴作袖同馳驅讀聖賢書學何事
棄我章服翻從胡胡兒法令嚴且酷小者鞭笞大者誅
爲爾謀義喪億萬爲爾謀利無錙銖何不少忍須臾待
日出甘抱明月投泥塗其中乞憐與丐伍朝夕部邑覺
驚趨候呵裏息風雨疾脅肩側足紛庭除稱功頌德大
文字千金自寶口中珠旁觀見者咸欲嘔彼人是哉子

曰迂此等僇促不堪道漱口洗齒毋令污載以小車送
之去舍令小鬼乞作奴復有一種大豪傑朝立程門暮
待朱筆鋒瀾翻變天地能令肉者立骨骨復腴一聞犬
羊方試士心搖技癢難斯須少婦銜嫁不得坐理我筐
篋整我襦分明入苙謂入殼蜣蜋抱糞生死俱猶自揚
揚鳴得意今也孝廉前巨儒紅纓葳蕤光照地摩拂斗
笠來于于里中小兒不解事耳熱新貴避路衢惟有倚
門舊犬怪非主睨柱熟祝嗚嗚嗚吁嗟爾士一何愚
吁嗟爾官一何愚昔爲麟鳳今爲貍獠師張弓欲射虎

爲虎拂拭俚先驅當時射策明光宮聲價颺然照乘珠
久歷仕宦老商賈計較子息籌錙銖赭山鼓橐鍊金錫
乾海張網羅珊瑚心中百城戰不下顧上千鎧生來俱
忽然玄黃東戰西庭中流血大吏誅西人迴戈復東戰
麒麟刀俎鸞鳳斂兩番報復快私怨坐見宮闕成荒蕪
君王自抱鼎湖痛臣子誰持龍髯呼側聞賊庭方唱名
嬖跚階前盡日晡須臾虜來十萬騎賊戰不勝中夜遁
殘膏賸粉更整飾賊之下陳奴之奴不知羞耻是何物
笑指公等胡拘拘辨髮胡服先意迎坐以盤膝拜以膜

馬上威儀青絲絡堂前歌舞紅氍毹如公爲計則得矣
天下獨無清議乎且置名節勿復道與爾指畫身家圖
從來冰山不可恃況復虜性影忽張之弧君不見毘陵
一大姓握衣屏息偃僂趨忽然反覆生狼心摔抑階下
如孤雛備受楚毒至於死沒其家產羈其孥兢兢業業
抱虎臥猛虎於我何葭莩雖當相狎似相信正如罨捕
豕鹿歸庖廚向爲身家棄名義今知身家不足保名義
亦何辜何不還爲忠義鬼扶搖三千里與日星川嶽而
爲徒吁嗟爾官一何愚

吁爾大將何其愚關門迢迢不可踰積石盤互如爪牙
雖然解柝還躊躇虜人笑謂吾無人使以百騎守關口
吾雖十萬能馳驅我卽未能北向而爭帝固吾厄塞稽
吾營壘下之不失爲邾句奈何斂兵壁閒處椎牛擊鼓
迎封疆北人誇耀銀箛鞞南人珍重金僕姑抱頭鼠竄
亦足矣面縛輿櫬胡爲乎此如猛虎搏噬愛其餘力
憐其劬蛇行匍匐入虎穴再拜稽首呈微軀勝負兵家
自常事迴環往復如構繆越王棲會稽種蠡沈泥塗二
子還羈越聲名何天衢卽無鐵象走沙漠還有金翅飛